

〔語孟字義〕性凡五條

性生也，人其所生，而無加損也。董子曰：性者生之質也。周子以剛善剛惡，柔善柔惡，不剛不柔，而中焉者爲五性，是也。猶言梅子性酸，柿子性甜，某藥性溫，某藥性寒也。而孟子又謂之善者，蓋以人之生質雖有萬不同，然其善善惡惡，則無古今無聖愚一也，非離於氣質而言之也。

〔聖教要錄〕性

理氣妙合，而有生生無息底，能感通知識者性也。人物生生，無不天命，故曰天命之謂性。理氣相合，則交感而有妙用之性。凡天下之間有象，乃有此性也。此象之生，不得已也。有象乃有不得已之性，有性乃有不得已之情意，有情意乃有不得已之道。有此道乃有不得已之教。天地之道至誠也。

〔辨名〕性情才七則

性者生之質也。宋儒所謂氣質者是也。其謂性有本然，有氣質者，蓋爲學問故設焉。亦誤讀孟子，而謂人性皆不與聖人異，其所異者氣質耳。遂欲變化氣質，以至聖人。若使唯本然而無氣質，則人人聖人矣。何用學問？又若使唯氣質而無本然之性，則雖學無益，何用學問？是宋儒所以立本然氣質之性之意也。然胚胎之初，氣質已具，則其所謂本然之性者，唯可屬之天，而不屬於人也。又以爲理莫有所局，雖氣質所局，實有所不局者存，則禽獸與人何擇也。故又歸諸正通偏塞之說，而本然之說終不立焉。可謂妄說已。書曰：惟人萬物之靈。傳曰：人受天地之中以生。詩曰：天生蒸民，有物有則。民之秉彝，好是懿德。孔子釋之曰：有物必有則，民之秉彝也。故好是懿德。文言曰：利貞者性情也。大傳曰：成之者性，是皆古人言性者也。合而觀之，明若觀火。蓋靈頑之反，然亦非宋儒虛靈不昧之謂。中偏之對，然亦非宋儒不偏不倚之謂。皆指人之性善移而言之也。辟諸在中者之可以左，可以右，可以前，可以後也。物者謂美也。美必倣效，是人之性也。是亦言其善移也。孔子又曰：上知與下愚不移。亦言其它皆善移也。貞者不變也。謂人之性不可變也。成之者性，言其成就各隨性殊也。人之性萬品，剛柔輕重，遲疾動靜，不可得而變矣。然皆以善移。